

Meningkatkan Kesejahteraan Rakyat

Pendahuluan

Prestasi,
2016-2017

Prestasi Outcome
Terpilih

Prestasi Bidang Fokus

Isu dan Cabaran

Kesimpulan

3

Pendahuluan

Dalam tempoh Rancangan Malaysia Kesebelas, 2016-2020, kesejahteraan rakyat kekal sebagai satu daripada teras utama bagi memastikan pembangunan yang seimbang selaras dengan pertumbuhan ekonomi. Secara umumnya, kesejahteraan rakyat berkait rapat dengan taraf dan kualiti hidup yang merangkumi aspek ekonomi, sosial, fizikal dan psikologi. Dalam tempoh kajian semula, 2016-2017, peningkatan kesejahteraan rakyat telah dicapai melalui usaha bersepadu oleh pelbagai pihak berkepentingan, terutamanya dalam penyediaan penjagaan kesihatan dan perumahan mampu milik yang berkualiti. Di samping itu, pelaksanaan pelbagai program pencegahan jenayah dan keselamatan jalan raya serta perkhidmatan kecemasan telah mewujudkan persekitaran hidup yang lebih selamat. Sementara itu, program integrasi sosial dan perpaduan terus menjadi platform untuk memperluas interaksi dan penglibatan dalam kalangan rakyat. Program dan inisiatif untuk mempromosikan gaya hidup aktif dan sihat serta memupuk perpaduan dalam kalangan rakyat Malaysia telah menarik penglibatan yang besar di seluruh negara. Walau bagaimanapun, beberapa isu dan cabaran masih menjadi kebimbangan termasuk peningkatan beban penyakit, rumah mampu milik yang tidak mencukupi, trend jenayah yang sentiasa berubah, perilaku yang tidak selamat dalam kalangan pengguna jalan raya, polarisasi sosial dan gaya hidup yang tidak aktif.




Prestasi, 2016-2017

Indeks Kesejahteraan Rakyat Malaysia (MyWI¹) meningkat sedikit daripada 121.8 mata pada tahun 2015 kepada 122.8 mata pada tahun 2016, seperti yang ditunjukkan dalam *Paparan 3-1*. Berdasarkan kepada indikator MyWI, peningkatan ini mencerminkan kesejahteraan ekonomi dan sosial rakyat Malaysia bertambah baik sedikit dalam tempoh kajian semula. Walau bagaimanapun, tempoh perbandingan yang lebih panjang antara tahun 2000 dan 2016 menunjukkan bahawa indeks keseluruhan meningkat sebanyak 22.8 mata. Indeks subkomposit kesejahteraan ekonomi meningkat dengan lebih tinggi sebanyak 30.3 mata, berbanding dengan indeks subkomposit kesejahteraan sosial yang meningkat sebanyak 18.6 mata dalam tempoh yang sama.

Dimensi ekonomi MyWI merangkumi komponen seperti pendapatan dan pengagihan, pengangkutan dan pendidikan, manakala dimensi sosial termasuk perumahan, kesihatan, keselamatan awam dan penyertaan sosial. Dalam tempoh 2000-2016, indeks subkomposit kesejahteraan ekonomi meningkat lebih tinggi daripada indeks subkomposit kesejahteraan sosial, disumbangkan terutamanya oleh peningkatan dalam komponen pengangkutan, pendapatan dan pengagihan. Sebahagian besar komponen dalam indeks subkomposit kesejahteraan sosial menunjukkan peningkatan. Namun, komponen alam sekitar dan kesihatan hanya meningkat sedikit manakala komponen keluarga telah menurun dalam tempoh yang sama.

Paparan 3-1

Indeks Kesejahteraan Rakyat Malaysia, 2000-2016



¹ MyWI ialah indeks komposit yang mengukur kesejahteraan rakyat Malaysia dan mengandungi 68 indikator meliputi 14 komponen kesejahteraan ekonomi dan sosial.

Pelbagai inisiatif telah dilaksanakan untuk meningkatkan kesejahteraan rakyat melalui enam bidang fokus seperti berikut:



Prestasi Outcome Terpilih

Dalam tempoh kajian semula, pelbagai inisiatif dan usaha telah dilaksanakan untuk meningkatkan kesejahteraan rakyat dalam enam bidang fokus. Berdasarkan sasaran sebelas outcome terpilih, enam daripadanya merekod kemajuan mengikut perancangan, manakala


lima outcome menghadapi kesukaran untuk mencapai sasaran. Prestasi outcome terpilih bagi enam bidang fokus tersebut adalah seperti yang ditunjukkan dalam *Paparan 3-2*.

Paparan 3-2

Sorotan

Rancangan Malaysia Kesebelas: Outcome Terpilih dan Prestasi

Peningkatan keseluruhan dalam Indeks Kesejahteraan Rakyat Malaysia (MyWI¹)




Nota: ¹ MyWI bukan sebahagian daripada outcome terpilih.

Mewujudkan persekitaran hidup lebih selamat untuk masyarakat yang berdaya maju dan sejahtera

Meningkatkan keselamatan jalan raya dan perkhidmatan kecemasan untuk mengurangkan fataliti

Membudayakan semangat 1Malaysia untuk memperkukuh kesepaduan sosial dan perpaduan nasional



● Sasaran Asal ● Prestasi

Prestasi Bidang Fokus

Di bawah enam bidang fokus, beberapa strategi dan inisiatif telah dikenal pasti untuk menyokong penyampaian setiap outcome terpilih. Sorotan bagi setiap prestasi utama bagi bidang fokus adalah seperti berikut:

Bidang Fokus	Pencapaian Utama, 2016-2017
 <p data-bbox="211 842 667 909">Mencapai Akses Sejangat kepada Penjagaan Kesihatan Berkualiti</p>	<p data-bbox="758 667 1473 701">Meningkatkan sokongan kepada kumpulan sasar</p> <ul data-bbox="758 741 1804 1135" style="list-style-type: none"><li data-bbox="758 741 1804 808">○ Terdapat 153 hospital awam dan institusi perubatan khusus serta 2,863 klinik kesihatan sehingga penghujung tahun 2017<li data-bbox="758 848 1804 953">○ Terdapat 204 klinik bergerak, 361 Klinik 1Malaysia, 11 Klinik Bergerak 1Malaysia (20 pasukan) serta 12 pasukan perkhidmatan doktor udara bagi memberikan perkhidmatan di luar bandar dan pedalaman sehingga penghujung tahun 2017<li data-bbox="758 993 1804 1060">○ 133 klinik kesihatan telah menubuhkan pasukan perkhidmatan penjagaan kesihatan domisiliari bagi memberikan perkhidmatan penjagaan kesihatan di rumah<li data-bbox="758 1100 1804 1135">○ 96 klinik kesihatan telah menubuhkan pasukan penjagaan kesihatan primer <p data-bbox="758 1175 1770 1241">Menambah baik sistem penyampaian untuk outcome kesihatan yang lebih baik</p> <ul data-bbox="758 1282 1804 1568" style="list-style-type: none"><li data-bbox="758 1282 1804 1427">○ Akta Perintah Fi (Perubatan) 1982¹ disemak semula dan struktur fi baharu diperkenalkan pada tahun 2017 bagi perkhidmatan penjagaan kesihatan terpilih untuk mengurangkan beban kewangan Kerajaan dan pada masa yang sama memastikan penjagaan kesihatan yang berkualiti<li data-bbox="758 1467 1804 1568">○ Pelaksanaan Pelan Tindakan Pemakanan Kebangsaan Malaysia III, 2016-2025, Pelan Strategik Kebangsaan bagi Penyakit Tidak Berjangkit, 2016-2025 dan Pelan Strategik Kebangsaan bagi Gaya Hidup Aktif, 2017-2025 <p data-bbox="758 1608 1784 1659">Nota: ¹ Fi bagi Wad Kelas 1 dinaikkan sebanyak 50%, manakala fi bagi Wad Kelas 2 dinaikkan sebanyak 25%. Tiada perubahan fi bagi Wad Kelas 3.</p>

Bidang Fokus	Pencapaian Utama, 2016-2017
	<p>Memperluas kapasiti bagi meningkatkan akses</p> <ul style="list-style-type: none"> ○ Memperkenal 14 inisiatif di bawah Pakej Pengkelan Pakar ○ Amalan pengurusan kejut² telah diperluas kepada 36 hospital awam. Sebagai contoh, waktu menunggu untuk berjumpa doktor di zon hijau, jabatan kecemasan telah dikurangkan sebanyak 3 minit daripada 40 minit kepada 37 minit ○ Konsep hospital kluster³ telah diperluas kepada 7 hospital awam <p>Mempergiat kerjasama untuk meningkatkan kesedaran kesihatan</p> <ul style="list-style-type: none"> ○ Program Komuniti Sihat Pembina Negara (KOSPEN) yang bertujuan untuk mempromosi gaya hidup sihat dan aktif melibatkan 720,760 peserta di 7,000 kawasan ○ Program IMFree diperluas kepada 351 sekolah rendah dan prasekolah awam untuk memberikan kesedaran dalam kalangan pelajar tentang bahaya merokok ○ Sebanyak 5.5% Tabika Jabatan Kemajuan Masyarakat (KEMAS) telah melaksanakan program Tunas Doktor Muda⁴ pada tahun 2016 dan diperluas kepada 4.2% prasekolah di bawah Kementerian Pendidikan Malaysia pada tahun 2017 <p>Nota: ² Pelaksanaan pengurusan kejut di hospital awam merupakan inisiatif untuk meningkatkan kecekapan dengan meringkaskan proses kerja untuk mengurangkan tempoh menunggu, pergerakan pesakit dan proses berulang di jabatan kecemasan dan wad perubatan. ³ Konsep hospital kluster bertujuan untuk mengoptimumkan penggunaan kemudahan kesihatan dan menangani masalah kekurangan pakar di hospital bukan pakar. ⁴ Program Tunas Doktor Muda melatih pelajar tentang amalan kesihatan yang baik seperti penjagaan kebersihan, nutrisi, aktiviti fizikal dan juga mengekalkan persekitaran yang sihat.</p>

Penyediaan dan penambahbaikan pelbagai perkhidmatan dan fasiliti penjagaan kesihatan primer, disokong oleh perundangan dan dasar berkaitan yang disemak secara berterusan telah menyumbang kepada perkhidmatan penjagaan kesihatan yang berkualiti. Selain itu, inisiatif berterusan dalam meningkatkan modal insan telah dilaksanakan bagi memastikan bilangan personel kesihatan yang kompeten dan mahir adalah mencukupi. Pelan Tindakan Pemakanan Kebangsaan Malaysia III, 2016-2025, memberi penekanan kepada kepentingan nutrisi dalam mencegah dan mengawal cara pemakanan berkaitan penyakit tidak berjangkit (NCD) serta meningkatkan jaminan keselamatan makanan dan pemakanan. Pelan Strategik Kebangsaan bagi Penyakit Tidak

Berjangkit, 2016-2025, pula menyediakan pelan tindakan untuk mengurangkan beban NCD yang boleh dicegah dan dielak menjelang tahun 2025. Di samping itu, Pelan Strategik Kebangsaan bagi Gaya Hidup Aktif, 2017-2025, yang merangkumi dasar, program dan inisiatif yang komprehensif telah dirangka untuk meningkat dan menyokong gaya hidup sihat dalam kalangan rakyat Malaysia. Walau bagaimanapun, peningkatan trend NCD, penyakit berjangkit (CD) dan nisbah kematian ibu mengandung (MMR) bagi setiap 100,000 kelahiran serta kekurangan fasiliti dan perkhidmatan penjagaan kesihatan awam memberi cabaran kepada kesihatan rakyat dan penyampaian perkhidmatan kesihatan.

Bidang Fokus



Menyediakan Perumahan Mampu Milik yang Mencukupi dan Berkualiti kepada Isi Rumah Miskin, Berpendapatan Rendah dan Sederhana

Pencapaian Utama, 2016-2017

Meningkatkan akses kepada perumahan mampu milik bagi golongan sasaran

- 450,610 unit atau 69% daripada sasaran 653,000 unit rumah sedang dalam pelbagai peringkat pelaksanaan
- 139,329 unit atau 30.9% daripada 450,610 unit telah siap. Antara unit yang telah siap di bawah pelbagai inisiatif:
 - Program Perumahan Kerajaan Negeri: 32,862 unit
 - Syarikat Perumahan Negara Berhad: 31,421 unit
 - Program Perumahan Rakyat: 20,381 unit
 - Pemaju swasta: 13,967 unit
 - Perbadanan PR1MA Malaysia: 11,484 unit
 - Program Bantuan Rumah: 10,919 unit
- 2,598 pembeli telah mendapat faedah daripada Skim Perumahan Mampu Milik Swasta manakala 1,474 pembeli telah mendapat faedah daripada Skim Pembiayaan Deposit Rumah Pertama
- 1,432 unit rumah disediakan untuk golongan muda dan pasangan muda yang baharu berkahwin di bawah program Rumah Transit 1Malaysia
- 2,713 isi rumah miskin dan berpendapatan rendah telah mendapat faedah di bawah Program Sewa-Beli Rumah

Memperkuh perancangan dan pelaksanaan perumahan awam mampu milik

- Sistem Bank Data Perumahan Negara yang dibangunkan oleh Jabatan Perumahan Negara membolehkan perkongsian data dalam kalangan agensi dan kerajaan negeri bagi meningkatkan penyelarasan serta pelaksanaan program perumahan awam mampu milik di lokasi yang sesuai
- 458 unit rumah awam mampu milik telah dibina di atas tanah wakaf melalui kerjasama pintar di antara Jabatan Wakaf, Zakat dan Haji dan institusi lain seperti majlis agama Islam negeri, Yayasan Waqaf Malaysia, Lembaga Tabung Haji, pemaju swasta dan institusi kewangan

Bidang Fokus	Pencapaian Utama, 2016-2017
	<p>Menggalakkan penyediaan kemudahan yang mesra persekitaran untuk meningkatkan daya huni</p> <ul style="list-style-type: none"> ○ Pelaksanaan Program Penyenggaraan Perumahan di 42 kawasan perumahan awam kos rendah dan sederhana memberi manfaat kepada 90,760 isi rumah ○ Pelaksanaan Tabung Penyelenggaraan 1Malaysia di 134 kawasan perumahan swasta kos rendah dan sederhana memberi manfaat kepada 238,566 isi rumah

Pelbagai program perumahan mampu milik, terutamanya perumahan awam, telah menyumbang kepada peningkatan pemilikan rumah dalam kalangan isi rumah miskin, berpendapatan rendah dan sederhana. Pemilikan rumah bagi kumpulan isi rumah berpendapatan 40% terendah (isi rumah B40) di kawasan bandar meningkat daripada 66.1% pada tahun 2014 kepada 73.2% pada tahun 2016. Kemampuan isi rumah B40 untuk memiliki rumah kos rendah bertambah baik bagi hampir semua negeri pada tahun 2016. Peningkatan ini adalah berdasarkan indikator kemampuan pemilikan rumah yang menunjukkan harga rumah berada pada tahap kurang daripada tiga kali ganda pendapatan penengah tahunan isi rumah B40. Walau bagaimanapun, harga rumah kos rendah di empat negeri, iaitu Wilayah Persekutuan Kuala Lumpur, Pulau Pinang, Sabah dan Sarawak adalah berada di luar kemampuan isi rumah B40.

Perumahan mampu milik yang tidak mencukupi di kawasan bandar masih menjadi isu dalam kalangan kumpulan isi rumah berpendapatan 40% pertengahan (isi rumah M40) berikutan kenaikan harga rumah dan kadar sewa. Secara umumnya, isi rumah M40 mampu memiliki rumah kos rendah dan rumah teres setingkat di hampir kesemua negeri. Namun, mereka menghadapi masalah kemampuan yang serius sekiranya berhasrat memiliki rumah teres dua tingkat. Program perumahan yang disediakan oleh agensi awam pula lebih cenderung untuk menyasarkan isi rumah B40 dan kurang untuk isi rumah M40. Oleh itu, isi rumah M40, terutama yang berada pada tahap pendapatan separuh ke bawah tersepit dalam isu perumahan memandangkan mereka tidak layak untuk membeli rumah kos rendah dan tidak mampu membeli rumah di bawah kategori lain dengan harga rumah yang meningkat secara mendadak.

Bidang Fokus	Pencapaian Utama, 2016-2017
 <p data-bbox="217 693 667 828">Mewujudkan Persekitaran Hidup Lebih Selamat untuk Masyarakat yang Berdaya Maju dan Sejahtera</p>	<p data-bbox="758 520 1282 550">Mempertingkatkan pencegahan jenayah</p> <ul data-bbox="758 586 1816 768" style="list-style-type: none">○ Pembinaan 29,400 meter laluan pejalan kaki serta pemasangan 1,919 lampu jalan, 363 papan tanda amaran dan 61 cermin keselamatan pencegahan jenayah di kawasan sering berlaku jenayah di bawah inisiatif Pemutihan <i>Black Spot</i>○ Kedudukan Malaysia bertambah baik daripada Tahap 3 pada tahun 2014 kepada Tahap 2 pada tahun 2017 dalam Laporan <i>United States Trafficking in Persons (USTIP)</i> <p data-bbox="758 802 1568 832">Meningkatkan kesedaran mengenai pencegahan jenayah</p> <ul data-bbox="758 868 1816 1100" style="list-style-type: none">○ 238 program kesedaran CyberSAFE bagi menggalakkan penggunaan internet dan media sosial secara bertanggungjawab memberi manfaat kepada 42,938 peserta○ 7,478 program kesedaran oleh AMANITA bagi memberi maklumat kepada suri rumah mengenai keselamatan diri dalam pencegahan jenayah○ 4,314 program oleh Agensi Antidadah Kebangsaan untuk meningkatkan kesedaran bagi mencegah penyalahgunaan dadah <p data-bbox="758 1135 1695 1165">Memperkukuh program rawatan, pemulihan dan pascapemulihan</p> <ul data-bbox="758 1201 1806 1548" style="list-style-type: none">○ 5,119 banduan tamat latihan dalam pelbagai bidang○ 346 banduan yang diparol mendapat pekerjaan dalam sektor perkilangan dan perladangan○ 277 penagih dadah yang tamat latihan di bawah program <i>Cure and Care Vocational Centre</i> mendapat pekerjaan○ Kadar pengulang laku jenayah yang telah menjalani Program Pemulihan Pemasarakatan dan Sistem Parol adalah rendah, iaitu masing-masing pada 0.38% dan 0.42%

Pelaksanaan pelbagai usaha pencegahan jenayah seperti Program *Omnipresence*, Program Bandar Selamat dan program pengawasan jenayah berasaskan komuniti berjaya mewujudkan persekitaran hidup yang lebih selamat. Usaha ini menyumbang kepada penurunan dalam jenayah indeks² pada purata 7.3% setahun dalam tempoh kajian semula. Kaji selidik mengenai persepsi rasa selamat yang dijalankan pada tahun 2017 di Pulau Pinang, Johor,


Selangor dan Wilayah Persekutuan Kuala Lumpur menunjukkan bahawa 63% orang awam merasakan persekitaran hidup lebih selamat berbanding dengan sasaran 60% pada tahun 2020. Walau bagaimanapun, ancaman baharu seperti jenayah siber dan keganasan perlu terus ditangani bagi menjamin ketenteraman awam dan persekitaran hidup yang lebih selamat.

² Jenayah indeks merangkumi 13 jenis jenayah keganasan dan harta benda iaitu bunuh, rogol, samun berkumpulan dengan senjata api, samun berkumpulan tanpa senjata api, samun dengan senjata api, samun tanpa senjata api, mencederakan, curi, curi kereta, curi motosikal, curi van/lori/kenderaan berat, ragut, dan juga pecah rumah dan curi.

Bidang Fokus	Pencapaian Utama, 2016-2017
 <p data-bbox="213 707 691 842">Meningkatkan Keselamatan Jalan Raya dan Perkhidmatan Kecemasan untuk Mengurangkan Fataliti</p>	<ul style="list-style-type: none"> <li data-bbox="782 534 1826 594">○ Indeks fataliti kemalangan jalan raya berkurangan daripada 2.59 bagi setiap 10,000 kenderaan berdaftar pada tahun 2016 kepada 2.34 pada tahun 2017 <li data-bbox="782 626 1826 687">○ Lebih daripada 20% pengurangan kadar kemalangan melalui penambahbaikan jalan raya di 10 lokasi kawasan kemalangan <li data-bbox="782 719 1826 780">○ Modul Pendidikan Keselamatan Jalan Raya perintis yang disemak semula memberi manfaat kepada 2,448 pelajar di 24 sekolah rendah di seluruh negara <li data-bbox="782 812 1826 872">○ Purata masa respons kecemasan berkurangan daripada 20 minit pada tahun 2015 kepada 14.5 minit pada tahun 2017


Dalam tempoh kajian semula, pelaksanaan pelbagai inisiatif dan program telah menyumbang kepada peningkatan tahap keselamatan jalan raya seperti yang ditunjukkan melalui penurunan indeks fataliti kemalangan jalan raya. Walaupun jumlah kematian akibat kemalangan jalan raya telah berkurangan daripada 7,152 pada tahun 2016 kepada 6,740 pada tahun 2017, bilangan ini masih tinggi berbanding negara lain. Penyebab utama adalah tingkah laku pengguna jalan raya dan keadaan jalan raya yang kurang baik

serta kenderaan yang tidak selamat digunakan. Dalam hal ini, pelaksanaan pelbagai inisiatif dan program bagi menangani isu keselamatan dan penyelesaian jalan raya tidak akan berkesan jika pengguna jalan raya masih lagi mengamalkan sikap dan tingkah laku yang membahayakan di jalan raya. Di samping itu, kurangnya kesedaran sivik dalam kalangan pengguna jalan raya merencatkan usaha untuk menambah baik masa respons kecemasan.

Bidang Fokus	Pencapaian Utama, 2016-2017
 <p data-bbox="310 1632 691 1768">Membudayakan Semangat 1Malaysia bagi Memupuk Kesepaduan Sosial dan Perpaduan Nasional</p>	<ul style="list-style-type: none"> <li data-bbox="782 1459 1826 1616">○ 177,000 program integrasi sosial dan perpaduan dilaksanakan melalui sukan, kesukarelawanan, pendidikan, kesenian dan kebudayaan serta kerja amal. Program utama termasuk FitMalaysia, Kelab Rukun Negara, Rukun Tetangga, Skim Rondaan Sukarela, Program Latihan Khidmat Negara, sambutan Hari Kebangsaan dan KOSPEN <li data-bbox="782 1649 1826 1709">○ Indeks Ketegangan Masyarakat mencatatkan 11.5 kes per sejuta penduduk pada tahun 2017 berbanding 9.6 kes pada tahun 2015 <li data-bbox="782 1741 1826 1802">○ 7,947 Rukun Tetangga dan 6,338 Kelab Rukun Negara telah ditubuhkan sehingga penghujung tahun 2017

Pelaksanaan pelbagai usaha dan inisiatif dalam memperkukuh kesepaduan sosial dan memupuk perpaduan nasional telah menyatupadukan rakyat Malaysia daripada pelbagai lapisan masyarakat. Ini dibuktikan menerusi penganjuran acara dan aktiviti yang menyatukan rakyat termasuk sukan, sambutan perayaan, bantuan bencana dan kerja amal. Walau bagaimanapun, masih wujud kebimbangan mengenai impak polarisasi sosial dan kewujudan sistem pendidikan yang pelbagai yang memberi kesan terhadap perpaduan nasional. Selain itu, penglibatan sektor

korporat dalam memupuk perpaduan nasional masih di tahap yang kurang memuaskan. Sementara itu, Indeks Ketegangan Masyarakat yang mengukur tahap ketegangan masyarakat dalam negara telah meningkat kepada 11.5 kes per sejuta penduduk pada tahun 2017 berbanding 9.6 kes pada tahun 2015. Meskipun indeks tersebut meningkat, ianya masih rendah berbanding had nasional iaitu 18 kes. Skor ini menunjukkan bahawa keadaan sosial di Malaysia adalah stabil dan menggambarkan budaya toleransi dalam kalangan rakyat Malaysia.

Bidang Fokus	Pencapaian Utama, 2016-2017
 <p data-bbox="294 1044 667 1141">Menggiatkan Sukan untuk Kehidupan yang Sihat dan Memupuk Perpaduan</p>	<ul style="list-style-type: none"> <li data-bbox="758 868 1729 923">○ Lebih daripada 10 juta peserta telah terlibat dalam program FitMalaysia, Hari Sukan Negara dan Liga Sukan untuk Semua di seluruh negara <li data-bbox="758 963 1695 1018">○ Peratusan rakyat Malaysia yang mengamalkan budaya bersukan meningkat daripada 41% pada tahun 2016 kepada 59.8%¹ pada tahun 2017 <li data-bbox="758 1058 1447 1092">○ 5 juta murid telah menyertai program 1Murid 1Sukan <li data-bbox="758 1124 1796 1245">○ Penambahbaikan kemudahan sukan, termasuklah menaik taraf <i>Kuala Lumpur Sports City</i> dan Stadium Juara Bukit Kiara serta pembinaan Velodrom Nasional bagi penganjuran Sukan Asia Tenggara (SEA) Kuala Lumpur 2017 dan Sukan Para ASEAN Kuala Lumpur 2017 <li data-bbox="758 1286 1806 1380">○ Atlet Malaysia memenangi 4 pingat perak dan 1 pingat gangsa dalam Sukan Olimpik 2016, serta 3 pingat emas dan 1 pingat gangsa di Sukan Paralimpik 2016 di Rio de Janeiro, Brazil <li data-bbox="758 1413 1766 1473">○ 18 atlet Malaysia menjadi juara dunia dalam sukan akuatik-terjun, tenpin boling, para-olahraga, para-badminton, silat, basikal trek dan wushu <li data-bbox="758 1505 1786 1600">○ Malaysia muncul sebagai juara Sukan SEA Kuala Lumpur 2017 dengan kutipan 145 pingat emas dan naib juara dalam Sukan Para ASEAN Kuala Lumpur 2017 dengan 90 pingat emas <p data-bbox="758 1620 1709 1669">Nota: ¹ Kajian Budaya Bersukan Rakyat Malaysia 2017 oleh Institut Penyelidikan Pembangunan Belia Malaysia, Kementerian Belia dan Sukan.</p>

Program dan inisiatif dalam menggalakkan sukan untuk kehidupan yang sihat dan perpaduan dalam tempoh kajian semula telah menunjukkan pencapaian yang positif, dengan kebanyakan sasaran dijangka akan tercapai menjelang tempoh akhir Rancangan. Pencapaian ini dibuktikan dengan peningkatan peratusan rakyat

Malaysia yang mengamalkan budaya bersukan daripada 41% pada tahun 2016 kepada 59.8% pada tahun 2017. Dalam memupuk perpaduan dan keakraban melalui sukan, penganjuran Sukan SEA Kuala Lumpur 2017 telah menarik penyertaan lebih daripada 10,000 sukarelawan daripada pelbagai lapisan masyarakat Malaysia.

Isu dan Cabaran

Malaysia masih menghadapi beberapa isu dan cabaran dalam penjagaan kesihatan, perumahan, pencegahan jenayah, keselamatan jalan raya, kesepaduan sosial dan perpaduan nasional serta sukan walaupun kesejahteraan rakyat meningkat dalam tempoh kajian semula. Antara outcome utama yang memerlukan usaha berterusan termasuk menyediakan perkhidmatan penjagaan kesihatan yang lebih baik dan perumahan mampu milik yang lebih banyak serta memastikan persekitaran hidup yang lebih selamat. Usaha yang lebih juga diperlukan untuk memupuk perpaduan dan mengamalkan gaya hidup sihat melalui sukan dalam kalangan rakyat.

Berdasarkan kepada MyWI, indeks komponen **kesihatan** mencatat paras tertinggi iaitu 114.8 mata pada tahun 2013 dan seterusnya menyederhana kepada 107.8 mata pada tahun 2016. Penurunan ini disebabkan terutamanya oleh beban NCD yang semakin meningkat akibat gaya hidup yang tidak aktif dan cara pemakanan tidak sihat, nisbah katil hospital kepada penduduk yang mendatar dan kenaikan MMR bagi setiap 100,000 kelahiran hidup daripada 23.8 pada tahun 2015 kepada 29.1 pada tahun 2016. Selain itu, beberapa faktor telah menambah beban kepada sektor penjagaan kesihatan awam. Antaranya adalah peningkatan permintaan untuk perkhidmatan penjagaan kesihatan yang lebih baik, perubahan pola penyakit, kekurangan personel penjagaan kesihatan dan kemudahan kesihatan yang tidak mencukupi, terutamanya di kawasan pedalaman.

Peningkatan harga **rumah** dan kadar sewa terus menjadi kebimbangan utama kerana menyebabkan kos sara hidup meningkat dan merupakan perbelanjaan terbesar bagi kebanyakan isi rumah. Dalam hal ini, cabaran utama adalah bekalan rumah mampu milik yang tidak mencukupi akibat daripada peningkatan kos pembinaan dan tanah. Di samping itu, terdapat ketidakpadanan dalam penawaran dan permintaan perumahan mampu milik yang berkualiti disebabkan oleh perancangan dan koordinasi yang kurang bersepadu antara pihak berkepentingan termasuk kerajaan negeri, pemaju dan agensi berkaitan. Selain itu, program perumahan awam sedia ada lebih tertumpu kepada isi rumah B40 dan kurang kepada isi rumah M40, sedangkan masalah kemampuan adalah paling kritikal dalam kalangan isi rumah M40 yang berada pada tahap pendapatan separuh ke bawah. Di samping itu, sejumlah besar peruntukan diperlukan untuk membiayai subsidi bagi pelaksanaan projek perumahan mampu milik seperti Program Perumahan Rakyat, namun pembiayaan ini tidak mampan dalam jangka panjang.

Malaysia terus menghadapi cabaran dalam aspek **keselamatan dan ketenteraman awam**, iaitu ancaman dari dalam dan luar walaupun jenayah indeks berkurangan dalam tempoh kajian semula. Antara

cabaran tersebut adalah trend jenayah yang sentiasa berubah, isu penguatkuasaan, jenayah siber, keganasan dan ekstremisme. Selain itu, penyalahgunaan dadah juga terus menjadi ancaman negara, terutamanya dalam kalangan belia. Bilangan penagih dadah baharu kekal tinggi iaitu 18,440 pada tahun 2017 disebabkan oleh kemunculan dadah sintetik yang baharu dan mudah diperoleh. Perneragangan orang masih menjadi isu utama memandangkan kedudukan Malaysia telah merosot ke Tahap Dua (Senarai Pemerhatian) dalam Laporan USTIP 2018. Di samping itu, 147 kes yang disabitkan telah direkodkan pada tahun 2017 berbanding 100 kes pada tahun 2016.

Usaha berterusan melalui kempen **keselamatan jalan raya** serta memperbaiki keadaan jalan raya di kawasan kerap berlaku kemalangan telah mengurangkan jumlah fataliti akibat kemalangan. Walau bagaimanapun, masih terdapat cabaran dalam mengubah minda dan tingkah laku pengguna jalan raya. Sementara itu, usaha untuk meningkatkan masa respons kecemasan juga menghadapi cabaran berikutan sumber yang terhad, kekurangan maklumat yang tepat mengenai kemalangan dan kesesakan lalu lintas.

Usaha memupuk **perpaduan nasional** dalam kalangan masyarakat Malaysia yang berbilang kaum masih menjadi cabaran berikutan polarisasi dan pelbagai bentuk ketidakseimbangan sosioekonomi merentasi wilayah dan etnik. Selain itu, proses integrasi sosial masih memperlihatkan kekurangan dari segi interaksi dan penglibatan berkesan dalam kalangan masyarakat bagi memupuk perpaduan dan toleransi. Sementara itu, kemajuan teknologi telah memudahkan penyebaran maklumat dengan lebih meluas dan pantas terutamanya melalui media sosial. Walau bagaimanapun, tindakan tidak bertanggungjawab segelintir individu dan kumpulan dalam menyebarkan bahan berbaur hasutan dan berita palsu boleh mencetuskan kebimbangan serta ketidakharmonian dalam kalangan rakyat. Situasi ini diburukkan lagi apabila pembaca beranggapan sebarang berita yang diterima melalui media sosial adalah benar.

Usaha memupuk **budaya bersukan** dalam kalangan rakyat Malaysia masih menjadi cabaran disebabkan gaya hidup yang tidak aktif serta kurangnya kesedaran terhadap kepentingan gaya hidup sihat dan aktif. Situasi ini diburukkan lagi dengan kurangnya keseimbangan antara kerja dan kehidupan serta kekurangan akses kepada kemudahan sukan dan rekreasi. Sementara itu, terdapat isu berkaitan pembangunan sukan termasuk mekanisme pencarian bakat yang kurang berkesan, penggunaan teknologi sains sukan yang rendah dalam pembangunan atlet, pengurusan persatuan sukan kebangsaan yang lemah serta pertumbuhan industri sukan yang perlahan.

